



Kasih ibu sampai ke syurga

Anak OKU terima Diploma Sains Komputer

Majlis Konvokesyen Universiti Malaysia Pahang (UMP) Ke-5 tahun ini, bukan sahaja menjadi detik bersejarah buat 1,030 graduan, tetapi juga turut menjadi saat paling berharga dalam hidup Siti Hawa binti Apendi, 21.

Beliau merupakan satu-satunya pelajar OKU yang menerima diploma pada Majlis Konvokesyen UMP pada 9 Oktober 2010 yang lalu.

Majlis penuh bersejarah itu disempurnakan oleh Canselor UMP, Kebawah Duli Yang Teramat Mulia Tengku Mahkota Pahang, Tengku Abdullah Al-Haj Ibni Sultan Haji Ahmad Shah Al-Musta'in Billah.

Walaupun bakal graduan Diploma Sains Komputer ini merupakan pengidap penyakit *Spinal Muscular Atrophy* (SMA) iaitu sejenis penyakit yang telah melemahkan urat sarafnya sejak kecil lagi dan menyebabkan beliau tidak boleh bergerak melainkan mendapat bantuan sepenuhnya daripada ibu beliau, namun beliau mampu berjaya

setanding dengan pelajar lain apabila sering kali dinobatkan antara penerima Anugerah Dekan saban semester dan menjadikannya antara pelajar cemerlang yang berjaya memperoleh PNGK sebanyak 3.79 pada semester akhir.

Walaupun di batasi dengan ketidakupayaan untuk bergerak, namun daya juang Siti Hawa sangat tinggi apatah lagi apabila melihat ibunya sanggup menolak kerusi roda ke dewan kuliah, menukar pakaian, menemaninya di asrama sepanjang masa dan pelbagai perkara lagi yang dilakukan oleh seorang ibu untuk anaknya.

Menurut ibu beliau, Zaidah Tamjis, 47, beliau tidak kisah menghabiskan masanya demi menguruskan Siti Hawa, malah beliau rasa sudah cukup gembira apabila melihat dia berjaya dalam hidup.

"Mungkin bagi orang lain ia menjadi beban tapi saya berasa cukup gembira



berada di sampingnya tiap masa, apatah lagi melihat anak yang saya jaga selama ini mampu melangkah ke menara gading seperti mana pelajar normal lain," ulas ibu Siti Hawa apabila ditanya pengorbanan yang dilakukan demi anaknya.

Siti Hawa pula menyifatkan ibunya seorang yang sangat penyayang dan banyak bersabar melayan karenahnya kerana bagi beliau ibu lain belum tentu melakukan perkara sama seperti mana ibunya.

"Setelah melihat pengorbanan ibu selama ini, saya merasa sangat terharu sekali. Saya meneruskan pengajian saya ke peringkat Ijazah Sarjana Muda juga atas permintaan ibu yang mahu lihat saya gembira.

"Saya akan melakukan apa sahaja asalkan ibu gembira walaupun saya kurang upaya," luah Siti Hawa.